

夷勝巷印篆初成而變冠凌突居人奔散藏印於堂屋瓦中蠻去之後四隣焚燼其所居獨在疑印之靈也

越州上虞縣延慶觀鐘驗

越州上虞縣郭郭間有隙地數畝時聞鐘鳴地中咸通年縣令夏侯頌傾心崇道以縣邑無觀買其地創造觀宇掘獲古鐘百餘斤上有文字曰正觀是冬賜額以降誕節祝壽所奏賜名延慶觀焉

道教靈驗記卷之十三

道教靈驗記卷之十四

廣成先生杜元庭集

齋醮拜章靈驗

陳武帝黃籙齋驗

陳武帝禪位之初江南大旱稼穡皆傷雖赦宥牲牢減膳避殿放官人解鳥獸賑卹窮之禱祝名山二年亢旱戶口凋減帝於延安殿召百辟會議致雨之術無以為對御史曹千齡奏曰衡嶽道士葛伯雲年數百歲常持陰符經山神虎狼出入侍衛必有非常之術可副陛下之求即命使徵伯雲至都下帝設禮加敬問致雨之術答曰但修黃籙道場拜告天地自當有應遂於正殿置壇虔誠修奉至第三日果降大雨三日三夜遠近均足苗稼再蘇歲乃大稔伯雲辭歸山帝賜雲冠羽衣文机寶杖委之而去自是較大臣公卿凡百士庶每歲祈福修黃籙道場持陰符經持於洞庭山置黃籙觀國內選度道士一千二百人大崇玄教矣

隋文帝黃籙齋驗

隋文帝開皇之初干戈不施寰海克定唯王謙後周舊臣勳名素重畏憚隋祖恐禍及其身遂據三蜀以圖變帝出師征之頻戰不克兵士多病死者相枕乃於內殿修黃籙道場祈天請祐三日夜夢神人降曰帝王上承天命下順人心天人合符然後有國今陛下革周立隋天所命也一方之力何以敵於四海之力乎帝曰剋屬弔民蓋不獲已但王師疾疫以此為憂爾神人曰疾疫者北人不堪瘴毒所以多病壇中法水可救億兆之人況偏師乎即見神人取壇中禁壇水向西南噴之曰雨至即疾愈無煩聖慮也于日進軍必當克蜀旬日軍中奏某夜雷雨灑營壘之上三軍疾者皆蘇無復瘴疫矣其後王謙傳首三蜀底寧果是于日也

唐高祖醮宗聖觀驗

唐高祖自太原入長安以公主駐軍司竹園親臨軍所使至樓觀謁聖祖老君以隋尚書蘇威莊二百頃賜觀充香油常住改名為宗聖觀時秦王征討四方東拒王充外禦實德

轉輸經費梓柚為勞欲祈清遠安萬姓駕
幸宗聖建醮祈福問觀主岐平定以克定天
下之事對曰陛下聖德感天秦王謀無不勝
此乃上天所命聖祖垂祐何寇孽不可誅也
今耕之時稍闕膏雨但歲豐人瞻天下剋日
可清矣上曰憂社稷未寧都不念及水旱如
師之言今秋請於神明致雨養農耳即入殿
於聖祖前炷香虔拜及便還宮於是風雨隨
駕直至京城三日而畿甸告足平定授金紫
光祿大夫焉

高宗三川投龍驗

高宗皇帝為生靈禱福累於內殿修齋皆有
靈應麟德元年差道士宋玉泉高善真馮善
英與蜀郡太守簡道通留守劉子瑒正月十
一日投龍於江濱池池水自長兩六出雪花
二月十一日投龍於隆山郡鼎鼻江有神龍
現三月十三日至真玄壇三浪井現是時帝
夢三台星下於蜀中及地而為浪井密詔玉
泉等與內使閻士泉沙門法密智同訪其
事至是浪井方現又夢金鳥栖於蜀川巨木

之上亦命訪之是年正月郡城界江側巨樹
有鳥三足栖於其上經宿而去至是皆符聖
夢乃置金鳥觀於巨木之下今屬溫江縣四
月二十一日投龍於九隴玉女房山獲青鳥
一雙陽平化獲連理嘉木七樹蜀郡隆山九
隴官更趙恩陳宏郡函使賈叔建清今闕租
材等四十餘人同觀祥異又詔各於其處致
醮告謝仍刻石於江濱玄壇今石碑存清廟
之側龍興觀碑側亦刻記其事

玄宗大寶觀投龍驗

玄宗皇帝詣司馬天師受三洞寶籙內殿致
齋投金龍於四明山之東南黃茂潭中上以
朱筆於金龍左脇直畫一條潛以為記內使
投龍醮畢有風雷起於潭中沸涌良久浮出
水版尺餘廣八九寸如古經蓋之蓋上有朱
漆書大寶二字其下有永昌二字是日京師
暴雨龍現於內寢庭中左脇有一條朱甲帝
喜曰我所投龍也左右若有言曰是大寶龍
及詰左右無道此言者遂詔賜四明投龍處
為大寶觀其潭號永昌潭及詔使還京以所

獲奏果符所賜之號焉

玄宗昭成觀齋驗

玄宗命天下道門蘭陵蕭道遠監造昭成觀既
畢於觀為昭成太后追福修明真道場七日
至第二日祥雲覆壇天樂奏於殿上夜有介
金神兵三十餘人立侍壇側空中言曰孝德
動天皆具以上聞載其事於蕭玄裕傳及碑
文中焉

玄宗拜黃素文驗

開元天寶間四海昇平三十餘載神仙贊助
賢良在朝而興心大道憂勤庶政天寶四載
乙酉正月甲子帝自製自書黃素文為生靈
祈福炷香拜表將表奏於上玄其表自飛入
空玄中杳不復見此氣盤鬱覆于御筵香案
之上空中有神人言曰聖壽延長羣官表賀
編于史館

僖宗金籙齋祈雨驗

僖宗皇帝即位之初務先儉嗇中外一遵宣
宗大中故事行幸賞賜文武階爵無濫於時
而已未歲三月不雨至于五月名山大川靈

湫郊壇所在祈祭未能致效時有淮浙人鍾
 常滿顧昭之皆有起龍致雨之術上俾行之
 內臣監於南山投冊有龍處微有雨澤不能
 均足聖慮憂軫中外焦勞計無所出司空平
 章事鄭畋上言曰風雨水旱實繫上玄山川
 百神皆上帝之臣吏也不能專其雨澤自春
 愆亢上軫聖情所作禱求未彰厥效臣愚以
 為上奏玉皇可以感降風雨少安聖慮請應
 天節日殿上選兩街高行道士各七人於內
 殿置金籙道場七日天下名山青城峨峴茅
 山天台羅浮五嶽等一十八處降賜詞文各
 修道場七日內殿請皇帝檢香祈禱以冀感
 通制可之十一日夜內殿開金籙道場十二
 日皇帝檢香躬拜日光赫烈萬里無雲隨駕
 寮屬往往諛謀於壇側良久還宮即微風旋
 來陰雲徐布午後大雨至十五日所司奏京
 畿雨足十八日將散道場詔延三日是夕又
 雨至二十一日方霽中外表賀萬姓歡呼寵
 渥頒賜特加優厚自是歲乃大穰

僖宗青城齋醮驗

中和辛丑歲僖宗駐蹕成都八月有大星流
 出虛危犯隋廟歷墳墓哭泣之星太史奏玄
 宗在蜀之年星文講見與此無異差道士於
 青城山修齋果有祥異請准故事於青城山
 齋醮以答天戒余奉敕與高品賜紫郭遵泰
 奏於文人觀修周天大醮宗玄觀置靈寶真
 文道場啟壇之夕神鐘鳴於空中殿上鐘不
 擊自響各五十餘聲聖燈徧山作虹橋花木
 之狀肉角金蛇見于壇上收而得之既而陰
 雲白雨自辰及成雨霽而失蛇所在山下居
 人傍隱家枯朽樓樹載生六枝旬月而各長
 數尺以事上聞詔曰宗玄道觀靈寶齋場星
 冠上奏於殊庭駟騎初傳於詔命光含五鳳
 狀列宿於遼空聲吼長鯨若飛霜於豐嶺或
 金鱗忽見或樓樹分榮神仙難期陰陽不測
 驗最祥異自師精虔功殊於五利文成事美
 於秦皇漢武喜歡所至寤寐不忘已付史臣
 故茲詔示復刻其事於幸蜀碑中

僖宗封青城醮驗

青城山昔黃帝詣龍師真人甯先生受龍踏

經得御飛雲之道乃封先生為五嶽丈人戴
 蓋天之冠著朱光之袍佩三庭之印為五嶽
 之上司與潛山司命廬山使者為三司之尊
 敕五嶽神一月載朝虛中灑水以代暴瀆其
 後歷代帝王雖置祠齋祭未載加封號僖宗
 皇帝中和元年辛丑七月十五日詔內臣袁
 易簡刺史王滋縣令崔正規與余詣山修醮
 封為五嶽丈人希夷真君是時縣境亢旱苗
 穀將焦封醮之夜龍吟於觀側溪中風雨大
 至枯苗載茂縣乃大豐以事上聞編于國史
 矣

葉法善醮靈驗

天師葉法善括州人也三世為道士皆有神
 術攝養登真之事法善符錄尤能効鬼神顯
 慶中高宗徵入內道場恩禮優異時駕幸東
 都法善於陵空觀作火壇設大醮城中士女
 咸往觀之俄有數十人奔投火中眾皆大驚
 救之而免亦無傷損法善曰此人皆有惡病
 為吾法所攝及問之果然盡為劫之其病皆
 愈法善自高宗中宗則天睿宗玄宗五朝來

往名山累召入內先天二年拜鴻臚卿封越國公贈其父歙州刺史馬

劉圖佩錄靈驗

劉圖字文剛年十五佩七十五將軍符錄少小明能計算身作江夏縣吏則復行貞謹以後漢安帝永初三年二月十日夜半子時太山君遣使者雅羽迎圖校定天下簿書奄忽將圖去使者語圖家人勿哭圖行當還耳圖逐使者至天上見太上老君北坐太山君東坐隱仙君南坐天師君西坐道德君中坐圖禮此五君訖太上老君教圖曰知汝奉道信真守善而死以明能計算故往喚汝欲令校定天下萬人簿書太山君教雅羽將圖去與左右承尉相見訖共校定天下簿書二日夜半文書悉理除死定生簿籍已了便辭請還太上老君曰使者將圖示罪福之地去雅羽乃將圖入彌離一重之內見三千餘女人齊懸頭大樹上足履百斤鐵杖而拷之次入二重之內見有三千餘男子足履百斤鐵杖懸頭樹上而拷之次入三重四重乃至十重之

內皆見受罪之人或者百斤鐵杖或懸頭樹上或反縛兩手或入鑊湯之中或頭戴重石或鐵叉叉身或著火中或更相鞭打皆身體爛壞苦毒無堪羽曰誹謗三寶欺枉百姓故也復入十一重之內見圖死父共三百男子更相鞭打圖便於天上平康獄邊大嗥吁叩頭曰圖父有何罪死遭此苦羽曰君父生時為獄吏殺人不同其罪枉害良善死入此罪已經七年可得生活也當為君奏天官解救君父耳圖因還啓太上老君叩頭百萬太上老君曰當為汝解放父耳勿復憂也又教雅羽將圖上太清宮中見三萬六千人著青衣手執金簡歌誦經文飲食備具音樂震天羽曰此人生時受佩天官符籙精進不息名入太清得受此樂圖於是請還老君告曰汝還下土宣吾所告示諸道俗天下之人罪福悉爾勿令造過汝迴倉猝略示數條耳又告汝等道俗并月月除罪解過今當依而行之我與汝共期子丑同會於白獸圖稽首禮謝而歸焉論曰夫人生死各有天曹地官考錄罪

福毫末無遺故經云天網恢恢疎而不失是也羅鄴山在北方地高二千六百里周迴二萬里洞天周迴萬萬里有六宮是為六天鬼神之官也每宮周迴一千里人死皆於中過隨緣受罪又此山上下及中各有八獄凡二十四獄及太山下有五府地獄諸山河海亦皆有之獄中各有令丞掾吏陰陽水火考官諸受罪之人備經三塗五苦訖或種蒙山石以副太山或汲西津水置於東海或生三惡道或生四夷中或生下賤或嬰六疾皆債前生之罪也故老君曰夫善者昇天堂惡者入地獄方復三塗五苦八難後生下賤畜生之類遷夷之國聖人愍之為說罪對矣此即文始先生內傳之明文也夫無知之人乃謂道家唯尚清虛而無報應或生慢黷豈不痛哉老君哀之故命圖示其罪福欲令一切咸改惡修善焉

道教靈驗記卷之十四